

XXXII. IGANDEA URTEAN ZEHAR (B)

Otoitza

Jainko ahalguztidun errukiorra,
 baztertu gugandik eragozpen guztiak,
 gorputz eta arimaz geure buruaren jabe izan gaitezen
 zure nahia betetzeko.
 Zure Seme Jesu Kristo.

I. IRAKURGAIA: 1 Erg 17, 10-16

*Emakume alargunak egin zuen bere irinetik sutopil txiki bat,
 eta Eliasi eraman zion.*

Erregeen liburutik

Egun haietan, jaiki zen Elias, eta Sareptara joan zen. Hiriko ateetara iritsi zenean, emakume alargun bat zebilen han, zotzak biltzen; Eliasek deitu eta esan zion: «Ekardazu ontzian ur pixka bat edateko». Eta bila zihoala, atzetik oihu egin zion: «Ekardazu ogi zati bat ere eskuan».

Hark erantzun: «Hala Jauna, zure Jaungoikoa! Ez dut ogirik; eskutada bat irin besterik ez daukat katilu batean, eta olio pixka bat olio ontzian; hain zuzen, oraintxe nindoan zotzak biltzera, niretzat eta nire semearentzat opila egiteko; hura jan, eta hil gaitezen».

Eliasek esan zion: «Ez izan beldurrik; joan eta egizu esan duzuna; baina egidazu lehenbizi niretzat sutopil txiki bat, eta ekar iezadazu; zeuretzat eta zure semearentzat gero egingo duzu. Hau baitio Jaunak, Israelgo Jaungoikoak: «Irinik ez da ahituko katiluan, ezta oliorik agortuko ere olio ontzian, Jaunak lur gainera euria bidaliko duen egunera arte».

Joan zen emakumea eta egin zuen Eliasek esana; eta jan zuten Eliasek eta ama-semeek; eta arrez gero ez zen irinik ahitu katiluan, ezta oliorik agortu ere olio ontzian, Eliasen ahoz Jaunak esan zuen bezala.

ERANTZUN SALMOA: Sal 145, 6c-7ab. 7c-8. 9-10

R/. Goretsazu Jauna, ene barrena.

Edota **Aleluia.**

Leiala da betiren beti,
 ematen die eskubidea zapaldui,
 ogia gose direnei. R/.

Atxilotuak Jaunak askatzen ditu,
 itsuen begiak Jaunak argitzen ditu.
 Konkor daudenak Jaunak ditu zutiarazten,
 zintzoak Jaunak ditu maitatzen. R/.

Arrotzak Jaunak ditu zaintzen,
 umezurtz eta alargunak laguntzen,
 eta gaiztoen asmoak eragozten.

Errege izango da Jauna sekuletan,
zure Jainkoa, Sion, menderen medetan. R/.

II. IRAKURGAIA: Heb 9, 24-28

*Kristok, askoren bekatuak kentzeko,
behin bakarrik eman zuen bere burua opari.*

Hebertarrei egindako epistolatik

Kristo ez zen sartu, giza eskuz egindako santutegi batean, egiazkoren antzera egindakoan baizik, zeruan bertan; orain gure alde Jaungoikoaren aurrean bitarteko dugularik. Eta ez du bere burua askotan eskaintzen, apaiz nagusia besteren odolarekin santutegian urtero sartzen zen bezala; horretarako askotan hil beharko zukeen, munduaren hasieratik; baina orain, garaiak bete direnean, behin bakarrik agertu da, bere burua opari emanetz, bekatua ezerezteko.

Eta gizakientzat behin bakarrik hiltzea erabakia dagoen bezala eta gero auzia, era berean Kristok, askoren bekatuak kentzeko, behin bakarrik eman zuen bere burua opari; bigarren aldiz, bekatuarekin zerikusirik gabe agertuko zaie Beraren zain daudenei, haiek salbatzeko.

EBANJELIOA: Mk 12, 38-44

Aleluia: Mt 5, 3

R/. Aleluia.

V/. Zorionekoak, gogoz behartsu direnak;
berena dute eta zeruetako erreinua. R/.

Irakurgaia laburragoa egin nahi bada, [] kako artean ematen den zatia utz daiteke.

*Alargun gaixo honek,
beste guztiek baino gehiago bota du.*

Jesu Kristoren Ebanjelioa San Markosen liburutik

Aldi hartan, [Jesusek, bere erakuskintzan, honela esaten zien jende taldeei: «Kontuz ibil idazlariekin! Jantzi ederretan ibili nahi izaten dute; enparantzetako agurrak, sinagogetan aurrenengo aulkiak, eta afarietan lehenengo jarlekuak nahi izaten dituzte; eta otoitz luze aitzakiatan, alargunen ondasunak irensten dituzte. Horrelakoen epaia zorrotzagoa izango da».] Dirutegiko atabaka aurrean eserita, Jesus jendeari begira zegoen, atabakara txanponak nola botatzen zituzten. Aberats askok ugari botatzen zuen. Etorri zen alargun behartsu bat, eta txanpon bi bota zituen.

Ikasleei deituta, honela esan zien: «Benetan diotsuet: alargun gaixo honek, atabakan botatzen duten beste guztiek baino gehiago bota du. Beste guztiek, gehiegi zutenetik eman baitute; honek, ordea, beharrezko zuenetik, bizitzeko zeukan guztia eman du».

Oparigaien gainekoa

Begi onez begira, Jauna, gure eskaintza honi;
zure Semearen nekaldiko misterioa ospatzen dugunok
haren fruituak irits ditzagun.

Errege bizi baita.

Jaunartze ondorengoa

Eukaristia harturik, eskerrak ematen dizkizugu, Jauna,
eta zure bihotz onari eskatzen diogu,
zure Espiritua isur diezaguzula,
zeruko indarra hartu dugunon bihotzetan
leialtasunaren graziak iraun dezan.
Jesu Kristo.